



Immikkoortoq 185

Nunarput qaammatit kingulliit 14-nit ilungersunarluinnartumik inissisimavoq. Naluneqanngitsutut ajuusaarnaqisumik USA-miit Nunatta pigineqarnissaa aquneqarnissaalu uteqqiasumik ulloq manna tikillugu oqariartuutigineqartarluni.

USA-p præident-iata oqaatsit assigiinngitsorpassuit atorlugit Nunatta pigilernissaa aquttuuffigilernissaa oqariartuutigaa. Tamanna siullermik 2019-mi pivoq oqariartuuteqarnerlu sakkortusisamik 2024-p naalernerani uteqqinneqarluni.

USA-p præident-iata 2025-p aallartinnerani suli ivertinneqaranili oqaaserisani ivertinneqareernermilu kingorna nangittumik tunuartinnikuunngilai ataatsimullu eqikkaraanni oqariartuut anguniagarlu tassaavoq: Kalaallit Nunaat USA-miit pigineqalissaaq aquneqalerlunilu.

Tamanna ajoraluartumik suli atuuppoq allangortinneqaranilu. Kingullertigut sakkulersorluni tiguaasinnaaneq tunuartiimiffigineqarpoq taamaakkaluartorli Nunatsinnut inuinullu isiginninneq allannguuteqarani: Kalaallit Nunaat USA-mut atalersinneqassaaq aquneqarlunilu.

Nunatsinnik piginnittuunermik aqutsilernermillu aqutissiornissaaq USA-miit ujartorneqarpoq. Nunatta nioqqutissatut pisarineqarsinnaanera innuttaasullu ataasiakkaat pisarineqarsinnaanerat ilaatigut oqariartuutitut ilaavoq. Kalaallit Nunaat USA-miit aquneqanngitsoq allaniit tiguarneqartussaanera oqaatigineqarpoq. Inuiaqatigiit pilluarnerulersussatut inissinnissaat aamma oqariartuutaavoq. Kalaallit Nunaat Danmark-imiit NATO-milu Europa-mi ilaasortaniit Russiniit Kina-miillu nunatta tiguarneqannginnissaa qulakkeerneqarsinnaanngitsoq USA-llu kisimi tamanna qulakkeersinnaagaa oqariartuutitut ilaalluni.

Oqaatigineqartut ullormiit ullormut assiginngisitaarput aammalu præident-i kisimi oqariartortuunani. Qanimut suleqatai aqutseqataalu assigiinngitsunik ilaatigut Nunatsinnut inuinullu nikasaarpalaartumik avissaartuuttitsinissamillu siunertaqartunik imalinnik ataannartumik ukiup nutaap aallartinneraniillu ingerlatarivaat.

Tamanna tupinnanngitsumik tamatsinnut ernumanermik annertuumik pilersitsivoq. Nunaqqatitta ilaat sinnarriorput, meeqqat inersimasut

ernumanerat annilaanganerallu malugaat tamattalumi aqagukkut suna tullinnguussinnaanersoq nalullugu najummatissimasarluta.

Naalackersuisuniit erseqqissumik oqaatigissavarput: Tamanna akuerineqarsinnaanngilluinnarpoq. Taamaattumillu erseqqilluinnartumik oqariartuutigalugu.

Oqariartuuteqarnerli kisimi naammanngilaq. Naalackersuisuniit ukioq kingulleq tamaat aammalu ukiup nutaap aallartinneraniilli annertusisamik Nunatta illersorneqarnissaa suliniutigisimavarput.

Sulinermi Nunatta ataqqinneqarluni inissisimanerata illersornissaa, killeqarfiit aammalu nunat tamat akornani maleruagassat inatsisillu ataqqineqarnissaat qitiutillugit. Aqutit eqqortut atorineqarnissaat aammalu tatigeqatigiinneq aqutigalugu oqaloqatigiinneq aqutigineqarnissaat qitiutinneqarnissaat attassimavarput sulilu attallugu.

Kalaallit Nunaat nalunngisarput, tassanilu periarfissat tunngavilerneqarsimasut illersorlugit Naalackersuisut sulipput. Kalaallit Nunaat meeqqatta kingornutassaat immeraatigineqarsinnaanngilaq niiverutigineqarsinnaananilu. Kunneqarfimmut atavugut Nunarpullu Namminersorneq pillugu inatsisip malillugu ineriartornini ingerlappaa tamannalu allaniit aqunneqartussaangilaq.

Nunatta tiguarniarneqarnermik aqunneqalernissamik pigineqalernissamillu oqariartorfigineqarnerani Danmark Naalackersuisuniit qanimut suleqatigilluinnarneqarpoq. Inatsisitigut taamaattussaavugut kisiannili inatsisiniinnaanngilaq.

Kalaallit Nunaat Kunneqarfik Danmark aqutigalugu NATO-mut ilaasortaavoq. USA-lu NATO-mi siuttutut inissisimanerani tassaasimavoq sorsunnersuup kingorna suleqatigisimasatta qaninnerpaat ilaat minnerunngitsumik illersornissakkut suleqatigineqarneratigut.

Naalackersuisullu Naalackersuisuusimasullu 2019-miillii illersornissakkut Nunatta namminerisamik Naalagaaffeqatigiinnerup iluani oqartussaaqataanera inissisimanermi annertusiartuinnartumik toqqaannarnerusumillu akuuffigilersimallugu tamannalu sulii annertusiartuinnartillugu.

Issittumik illersornissamut isumaqatigiissutit annertusiartortut Nunatta akuuffigilerpai tassanilu Naalackersuisuniit sulinerput annertusarsimallutigu. Qinigaaffimmi kingullermik ilaatigut NATO-mi Nunarput aallartitaqalerpoq tassani Nunatta illersornissakkut isumaa anguniagaallu toqqaannartumik Danmark peqatigalugu sulissutigineqalernissaat qulakkeerniarlugu.

Ukiup kingulliup ingerlanerani Naalakkersuisuniit EU-mi nunat annertuumik oqaloqatigisimavagut ukiullu massuma aallartinnerani annertusisamik ingerlassimaallugu. Tassani Danmark peqatigeqqissaarneqarpoq Kunngeqarfittut ataasiusutut nipeqarnissarput siunertaralugu. Tamannalu iluattittutut oqaatigineqarsinnaavoq.

Kisimiinngilagut aammalu illersorneqarpugut. EU-mi nunat tamarmiusut tunuliaqutserpaatigut. Ukiup aallartinnerani qunusaarinerit aallartinneqarmata ingerlaannartumik Europami nunat NATO-mi ilaasortaasut nunat siuttuusut tapersiillutik nalunaaruteqarput. Kunngeqarfiup killeqarfii ataqqineqarnissaat aammalu Nunatta namminiussuseqarnerata ataqqineqarnissaa oqariatuutigineqarluni.

Tassungalu atatillugu pingaaruteqarpoq oqaatigissallugu: Nunarput toqqaannartumik pineqaraluartoq NATO-p siunissaa taamatullu nunat killiit illersornissaat nunarsuatsinnilu tamat oqartussaaqataanerat aamma qitiulluinnarmat.

Nunat tamat akornani inatsisit malitassallu minnerunngitsumik killeqarfinnik nunamullu oqartussaaneq ataqqineqanngippat nunat pissaanilissuit nunarsuaq agguataarsinnaanngussavaat tassanilu kiffaanngissuseq namminiussuseqarnerlu atorunnaarsinneqassallutik.

Aallartinnermi oqaatigaaara ilungersunartumi sulii inissisimalluta. Naalakkersuisuniit kaammattuutigisimavarput ukioq kinngulleq marloriarluni iluatsissimanngikkaluartoq aammaartumik Danmark peqatigalugu USA saaffigineqassasoq aqqutit eqqortut atorlugit oqaloqatigiinnerit ingerlanneqarsinnaaqqullugit. Tamanna kiisami iluatissimavoq taamatullu Nunanut Allanut akisussaasut qanittukkut naapillutik. Kingunerivaa qaffasissumik atorfilittatigut oqaloqatigiinnerit aallartinnissaat.

Oqaloqatigiinnerit aallartippat kinguneqarluarsinnaanissaallu tamaviaarullugu Naalakkersuisuniit ingerlatissavarput.

Tamaakkaluartoq nunat killiit Danmark peqatigalugu qanimut oqaloqatigineqarnerat annertusisamik ingerlatiinnassavarput aammalu EU-mut qaninnersusumik suleqateqarnissaq sulissutigissavarput.

Ataatsimoorneq piffissami matumani pingaarnerpaavoq. NATO-mi, EU-mi, Kunngeqarfimmi minnerunngitsumillu nunatsinni.

Ataatsimoortariaqarpugut Kalaallit Nunaat nalunngisarput illersorlugu.
Ataatsimoortariaqarpugut Kunngaqarfinni inatsisit malillugit
namminiussuseqarnitta eriaginissaa, siunissatta nammineq aalajangernissaanut
periarfissatta aammalu ineriartortinnissaa ingerlatiinnarumallugu

Ataatsimoortariaqarpugut nunat tamat akornani inatsisit, ataqqinninneq
aammalu tamat oqartussaanut illersorniarlugu.